

Date – 19/11/2025

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. World Day Against Child Abuse pualin naupang venhimnaa a fawng chelhtute chu naupang venhimna kawnga tha an tih chak leh zual nan vawiin khan an thukhawm.
2. Education Minister Dr. Vanlalhlana'n Mizoram literacy rate chu sang mah se thiamna in a um zui loh chuan awmzia a awm lo a ti.
3. Prime Minister Narendra Modia chuan social security scheme ah ramchhunga khua leh tui vaibelchhe 100 chuang an inziaklut a ti.
4. International Film Festival of India (IFFI 2025) vawi 56-na chu naktukah Goa khawpui Panaji ah tan a ni dawn.

<><><>

WORLD DAY AGAINST CHILD ABUSE

World Day Against Child Abuse pualin naupang venhimnaa a fawng chelhtute chu naupang venhimna kawnga tha an tih chak leh zual nan vawiin khan an thukhawm.

Vawiin hi World Day Against Child Abuse a ni a, he ni pual hian Women & Child Development hnuaiia Aizawl District Child Protection Unit buatsaihin SP conference Hall ah naupang venhimnaa a fawng chelhtu pawimawh zual District Child Protection Unit, Special Juvenile Police Unit, Child Welfare Committee leh Juvenile Justice Board a thawkte in hmuhkhawmna leh naupang venhimna Kawnga tha an tih chak leh zual nan Sensitization meeting an nei a ni.

He hun hi Addl. SP Pu Zoramthara chuan kaihuaiin, naupangte venhimna kawnga thawktu hrang hrang thutkhawm pawimawh a tih thu a sawi a, he hunah hian SP Pu Zosangliana, pawhin thusawiin, naupangte chu Mizoram hmalam hun an nih angin, an nuna harsatna an tawh te'n an hmalam hun a tihchhiat theih avangin an naupan laia tawhsual an tawh lohna tura venhim a pawimawh thu a sawi a ni. JJB Principal Magistrate Pi Lalhlansangi Fanai chuan Juvenile Justice Act hnuaiia Police tih tur hrang hrang te a zirtir baw a, DCPO Pi R. Lalrinchhani chuan naupang venhimna kawnga thawktu hrang hrangte chu inlungual taka thawh ho a pawimawh thu a sawi a, naupang leh an chungkaw tana nelawm leh inhawng taka an awm thiam a pawimawh thu a sawi baw.

Vawiin khan Hnahthial District Child Protection Unit bultumin khawvel pum huapa Hleihlenna laka Naupangte Venna Ni - World Day for Prevention of Child Abuse pualin lirthei hmanga kawng zawh - Vehicle Rally neih a ni a. Bazar Veng kawng atanga zawh tan niin Electric veng bazar leh Govt. High School lamah te kawng zawh a nih hnuah Chanmari veng, Nauhruaikawn ah kharna hun hman a ni.

Vehicle Rally hawna programme hi Bazar Veng kawng neih niin District Child Protection Officer, Dr. R. Lalrinhlua chuan a kaihruai a. He hun hman chhan sawifiah nghalin mipuiten naupang hleihlenna tawh thinte himna kawng hma an lo lak ve theih nan a nih thu a sawi a. Naupang chu kum 18 la tling lo te an nih thu leh mihring enkawl na kawng hrim hrimah hian an upat tawh hnu, a ler atanga thuai lova, an naupan lai atanga uluk taka enkawl a tul thu a sawi a. Mizoram Child Welfare Committee (CWC) hnuai naupang chung a hleihlenna avangin case tam tak a luh tawh thu tarlangin April 2024- March 2025 chung khan CWC hnuai naupang case thar 1566 a luh thu a tarlang a.

Heng zingah hian retheihna avangin case 415 awmin nu leh pa, fate enkawl tlak lo avangin case 361 a awm a. Hei bakah hian hur sualna lam rawng kai (Sexual abuse) avangin case 158 a awm tawh thu tarlangin mipuite chu heng naupang tanpui ngaite hria an awm a nih chuan engtik lai pawhin 1098 ah call theih an nih thu a tarlang a ni.

Kumin chhungin Hnahthial District-ah kawng hrang hranga naupangte chung a hleihlenna case 107 report a awm thu he hunah hian tarlan a ni a. Hur sualna rawng kaia naupang chaklo zawkte tihbuaina a hluar thu tarlan niin chutianga che thinte chu dan angin na taka hrem theih an ni.

<><><>

SARDAR @ 150

Serchhip DC Pu Paul L Khuma hoin vawiin khan Serchhipah Sardar @150 Unity March huaihawt a ni a. Government Higher Secondary School, Serchhip atangin Serchhip Bawrsap Pisapui thleng kawng an zawh a ni.

Unity March hi Government Higher Secondary School atanga chhuakin Leisekawt Field ah cultural programme an hmang a. Kawng zawh bultan puitu Serchhip SP Pu Gavith Gogna chuan Unity March an neih chhan sawiin India ram chu ram bung hrang hrang, lal hrang hrangin an thut thin, princely state tam tak a inthendarh an ni a, tuna India ram hi British Sawrkar laka India a zalen hnuah piang a ni, a ti. Princely State tam tak a inthendarh te chu Sardar Valabhai Patel-a leh ram hruaitu hmasa te hmalaknain India ram bung khatah chhun khawm an ni a, tuna India ram tih a lo pian theihna tura mi pawimawh ber te zinga mi a nih avangin a piancham vawi 150na ah he hun ropui tak hi hman a ni, SP chuan a ti.

Unity March-ah hian Faina Beihpuithlak nghal a ni a. District Urban Development Officer (DUDO) Pu Vanlalhratpuia chuan faina leh thianghlimna a taka nunpui a tulzia sawiin zirlai te a fuih a. Kawng zawhtu zawng zawng te hian kawng tluanin bawlhhlawh an chhar fai a, fai inzirtirna leh faina hnatlang inkawp an nei nghal a ni.

Sawkar hnathawk, school naupang leh mipui thahnem tak he kawng zawhah hian an tel a ni.



EDUCATION MINISTER

Education Minister Dr. Vanlalhlana'n Mizoram literacy rate chu sang mah se thiamna in a um zui loh chuan awmzia a awm lo a ti.

He thu hi vawiina State Council of Educational Research & Training (SCERT) buatsaih EduTech Fest & Career Fair 2025, SCERT Office, Chaltilanga hawna inkhawmah sawiin, khawvel hmasawn chak tak karah, AI hmasawna ang zela insiamrem a tul a ti a. AI leh technology hmang thiam chu an dinchan dawn avangin hemi mila zirna her rem a, mahni intuaihriam a ngai tih a sawi a. Mizoram literacy rate chu sang mah se thiamna in a um zui loh chuan awmzia a awm loh tih sawiin, PARAKH (Performance Assessment, Review, and Analysis of Knowledge for Holistic Development) exam-ah Mizo zirlaite'n state danga an zir rualpuite an tluk loh hle avangin tan lak a ngai a ti a ni.

He hunah hian khualzahawm Mizoram Youth Commission Chairman Pu Malsawmzuala Ralte pawhin thu sawiin, hnathawk turin tumruhna, taimakna, leh thawhrim a ngai tih sawiin, thahnemngaih a tul hle a ti a, Corporate, Private, mahnia in din, entrepreneurship lama tanlak a pawimawh thu a sawi bawk a ni. MYC Chairman chuan MYC hmalakna hrang hrang sawi bawkin, Coaching class chi li an kalpui atanga zir chhuak mi 94-te chu sawrkar hnaa an inziahtlin tawh thu te, British Army form an fill up-pui zinga mi 5 chu British Army-a an luh tawh thu te, India-Taiwan Labor Mobility Agreement 2024 hnuaiah Mizo thalai 50 chu Taiwan-a hna thawk tura thawn an nih tur thu te, Japan-a caregiver tur te, Germany-a nurse tur te, India rama hotel changkanga spa therapist hna thawk tur te an thawn chhuah thin thu leh Food and Beverages Training Programme an kalpui thin thu te a sawi a ni.

He hunah hian Lunglei West bialtu MLA Pu T. Lalhlimpuia pawhin thu sawiin tunlai khawvela AI leh technology pawimawhzia sawiin, thiamna nei tan chuan khawvelah remchanna a tam a, remchanna uma man apiang chu mi hlawhtling an ni thin tih a sawi a ni.

VC: Ni hnih awh tur Edu Tech Fest & Career Fair 2025 hi vawiin leh naktukah SCERT Office, Chaltilangah neih a ni dawn a, he Festival-ah hian zirna atana technology hman tangkai theih dan chi hrang hrang pho chhuah leh inhrilh hriat a ni a, stall 22 awmin, School 42 in an chhim a ni.



PAINTING EXHIBITION

Mizorama lemziak intihsiakna lawmman tam berna - Painting Competition on Energy Conservation 2025 chu vawiin khan Cultural Centre cum Auditorium Aizawl Vaivakawn-ah buatsaih a ni.

He painting competition hi Ministry of Power hnuaia Bureau of Energy Efficiency (BEE) buatsaih niin, Mizoramah chuan Directorate of School Education leh Tuirial Hydro Power Station, NEEPCO tangkawp ten an buatsaih a, vawiina Cultural Centre cum Auditorium Vaivakawn-ah State Level Painting Competition-ah hian School Education Director, Pi Angela Zothanpuin a hmanpui a ni.

Kan corr report lo ngaithla ang.

VC

Energy Conservation Painting Competition hi Group hniha then niin, group-A ah hian class 5, 6 leh 7 chin a huam a, Group-B in class 8, 9 leh 10 a huam a ni a.

Kumin hian School level intihsiaknaah school 82 an tel a , Group-A ah naupang 1185 telin, Group-B ah 830 an tel thei a, school level a titha group-A atangin 50 thlan chhuah an ni a, Group-B atangin 50 thlan chhuan an ni. Heng naupang thlan chhuah 100-te hian vawiin khan "on-the -spot State Level Painting Competition" hi an hmachhawn a.

Group A leh B a lawmman pakhatna atanga Pathumna te hian National Painting Competition, New Delhia December 2025 a neih turah Mizoram ai an awl dawn a, lawmman pakhatna dawngtu hian cheng sing 5 a dawng a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

PM

Prime Minister Narendra Modia chuan social security scheme ah ramchhunga khua leh tui vaibelchhe 100 chuang an inziaklut a ti. Vawiina Bhagwan Sri Sathya Sai Baba piancham vawi 100-na lawmna Andhra Pradesh-a Puttaparthi-a neihah he thu hi sawiin Pu Modia chuan kum 2014 ah social security scheme hian vaibelchhe 25 chauh a huam laiin kuminah chuan vaibelchhe 100 a tling tawh a ti a. Andhra Pradesh mipuite chu tualchhung thilsiam lei uar tura sawmin ram sum dinmun chawikan kawngah tha thawh ve turin a sawm a ni. Vawiina Bhagwan Sri Sathya Sai Baba puala cheng 100 thir leh stamp siam tlangzarh a ni a. Hemi hma hian Prime Minister Modia hi Maha Samadhi-ah tawngtai bawk a ni.

<><><>

IFFI

International Film Festival of India (IFFI 2025) vawi 56-na chu naktukah Goa khawpui Panaji ah tan a ni dawn. He hunah hian khawvel huapa cinema lama mi hmingtha leh mi thiam tak takte an fuankhawm dawn a. Ram 81 atangin film 240 chuang chhuah a ni ang a. Kuminah hian Japan ram chu thlur bik tur ram "Country of Focus" ah puan a ni.

<><><>

PM

Prime Minister Narendra Modia chuan vawiin khan PM-KISAN installment vawi 21 chu Tamil Nadu-a Coimbatore atangin a tlangzarh. Tun tumah hian ramchhunga loneitu vaibelchhe 9 te hnenah cheng vaibelchhe sing 1 sang 9 chuang sem chhuah a ni. Prime Minister Modia

hian Coimbatore-a South India Natural Farming Summit a hmanpui
bawk a ni.

